

[Augsburg], 8. August 1570

An Theodor Zwinger

UB Basel, Fr. Gr. I 11, fol. 329r.

S. Quae cum Oporinianis egisti, Clarissime vir, domine et amice colende, grata mihi sunt. Vrgebo vt soluant. Quàm vellem mihi cum istis Euclionibus nihil esse negocij? De praefatione Isocratis eâdem impudentia vtuntur, qua in fraudando semisse pacti honorarij. Ego διαρρήδην iussi praefationem ad Caesarem cum versibus, autori preponi. Sed, quod factum est, infectum fieri nequit: et res eò melius habet, quòd Caesareae aulae D. Crato me excusauit, apud quam et ingrati animi et leuitatis nomine fui traductus innocens. Remundus Schmid maximas tibi agit gratias, et ego item beneficentiae tuae, qui illum meo nomine ita commendatum habueris, vtqüe habere pergas, si dignum fauore tuo se praebuerit, oro. Theatrum tuum et amplitudine et magnificentia et vtilitate, et immortalitate omnia haud dubiè veterum amphitheatra vincet: ac, vt tuis verbis vtar, τῷ τὲ εἶναι, καὶ τῷ εὖ εἶναι. A somno periculi nihil esse censeo tibi homini vigilantissimo καὶ μεθοδικωτάτῳ: fastidium autem discutit cùm publica vtilitas, tum nominis tui immortalitas: quae vel prima editione tibi parta fuit. Faxit Deus vt quamprimum feliciter optatum portum contingas. Me è portu philosophiae denuo in Demosthenicum pelagus, nescio quo Neptuno irato, reiectum, vigiliae et molestiae penè confecerunt. Sed iam terram video, et spero quietem: non quidem à Zoilorum obtrectationibus (nam hae quidem exacerbabuntur) sed ab aerumnis typographicis, quibus prorsus sum delassatus et penè confectus. Lucubrationum autem mearum exagitatores aut tuam ἐπιείκειαν περὶ τῆς τελειότητος sequi velim, aut ipsos in eodem genere proferre meliora. Quorum si neutrum fecerint, id illis maiori fraudi quam nobis futurum. Vale, et si quid me voles, impera. 8 Augusti. 1570.

Hiero[nymus] Wolfius  
Tuus.

D. Thomae Fregio rescribam, vbi cognouero, quo locorum se receperit. μετοικεσίαν γὰρ μελετᾶν ἔγραψεν. Sin adhuc isthic est, amanter eum meo nomine salutes velim.